

НАРОДНЫ НОВИНКЫ

р. XIX
ч. 13 – 16

9. априля 2009
ціна 0,20 €

КУЛЬТУРНО-СПОЛОЧЕНЬСКИЙ ТЫЖДЕННИК РУСИНІВ СР



• За чельный стіл 3. семінара карпаторусиністыкі засілі: (зліва) Педр. А. Плішкова, Пед., Педр. К. Шевченко, др. н., і Педр. М. Мальцовска. Выслушати лекцію прішло дость людей, котры ся интересуют історію Русинів. Наконєць акціі директорка Інштуту русиньского языка і культуры Пряшівской універзіты подаровала гостєви з Прагы – К. Шевченкови найновшы книжки о русиньскім языке, на приправі яких партіціповали работници того інштуту. Фоткы: А. З.

Христос воскрес – правдива подія радості

Раз хтось повів: „Якбы не было воскресіня Ісуса Христа, ніч бы не было“. Кідь ся гллубше задума- ме, мусиме быти согласны з тым речінєм.

Переступлінем Божого наказа- ня нашыма прародічима Адамом і Евов ся зродив гріх і єго наслідство – смерть. Од того часу смерть спро- ваджать чоловіка цілов єго історію. Тінь грішної смерти не дозволяв старозавітним праотцям і патриархам набыти вічне блаженство в небі.

Таксамо, отрова гріху губить нашы сердца і переносить свою ідею до наших каждоденных наглядів. Таким способом ся стаєме свідками „культуры смерти“. Є то все тогды, кідь сьме согласны з убиванєм немогучіх іщі ненародженых дітей. Коли молодежи нанукаме духовне загубліня через *безпечну* охрону в грішных звязках перед манжелством. Коли восени свого жывота собі добровольно купуєме смерть як фалшиву надію на штось ліпше. Коли упадеме до депресії зо страты роботы ці

по фінанчных проблемах.

Видить ся так, же культура смер- ти гріху є неоддільнов частєв нашо- го ествованя. Так бы то справды могло вызерати, но то є лем непє- реставаюче обдурєваня підлого духа. В часі воскресіня Ісуса Христа сьме свідками перемоги гріху. Велич Христовой події Воскресіня

каждому чоловікови понукать ідею жывота і надії. Христів божествен- ный подарунок приносить радость з перемоги жывота над смертєв і усвідомліня сі своєї властной достойности. Ёго воскресіня з мертвых нас піднимать з безнадії і научать нас „культури жывота“.

В теперішніх часах господарской крізы, неістоты і внуторно- го непокою, коли собі многы думають, же уж ніч не мать змысел, нам Воскресіня до наших душ вливать потіху, підкріпліня і надію на дашто ліпше. Є про нас знамінєм, же Бог є міцніший як гріх. І припо- мінать нам, же аж Воскресіня Ісуса Христа принесло яостне ествованя людському роду і правдиву радость. Радость з надії на вічний жывот ведно з Господом Богом в царстві небеснім.

Вшыткым чітателям *Народ- ных новинок* жычу радостне пережываня великодных свят і премного Божых благодатей.


о. Іван БАРНА,
грекокатолицький священик
у Светлицях



В пряшівскім регіоні выграв Іван Ґашпаровіч

У волебных окресах пряшівского регіону выграв у волябах на місце президента Сло- веньской републікі Іван ҐАШПАРОВІЧ. Івета Радічова ословила скоріше містьскых волічів, к вітязові ся кількостєв голосів приближыла у Пряшівскім окресі.

Іван Ґашпаровіч мав в окресах пряшівского регіону вышє 70-процент- ну підпору. В Пряшівскім окресі здобыв 56,01% голосів, Радічова 43,98%. В самім місті Пряшові тісно выграла Радічова перед Ґашпаровічом у порівнаню 50,81% ку 49,18% голосів. В далшых окресах были розділы выразнішы. Напри- клад, у Бардеївскім окресі Ґашпаровічови ся подари- ло здобыти 70,25% голосів, іщі вєце прихыленцїв мать сучасный президент в окресі Свідник, де го підпорило 77,79% волічів. Подобно то было і в окресах Сабінов



• Тоту фотографію старенового президента Івана Ґашпаровіча собі ціню, бо є з особным присвячінєм і підписом.

Топлєв (77,55%) або Строків окресах пряшівского регіону на северовыході Словень- ска, де жыють у великій мірі Русины, мав значну перевагу Іван Ґашпаріч. Конкретно: в окр. Гуменне – 71,28%, Стара Любовня – 74,9%, Снина – 81,25% і Міджілабірці – 83,45%.

Также президентом Словеньской републікі буде і в далшім 5-річнім волебнім періоді Іван Ґашпаровіч. Вырїшыло о тім у другім колі волеб 4. априля 2009 скоро 52 процент із цілкового чїсла 4 339 257 волічів. Сучас- на глава штату дістала 1 234 787 голосів, што было вєце як 55 процент зо вшыткых участників тогорічных волеб. Ёго протикандідатка, Івета Радічова, здобыла 988 808 голосів, то є 44,46 про- цента, што є про ню тыж немалым успіхом. А. З.

На третім семінарі карпаторусиністыкі – тема Підкарпатської Руси

Організатор: Інштут русиньского языка і культуры Пряшівской універзіты в Пряшові.

Термін і місце реалізаціі: 8. априль 2009, Музей русиньской культуры в Пряшові.

Выступаючий: історік і соціолог, ПгДр. Кіріл Шевченко, др. н., Інштут російских штудій у Празі.

Тема реферату: *Културна і народностна політика Прагы на Підкар- патській Руси в 20-х роках 20. стороча.*

В діскузіі выступили: Мгр. Гавриіл Бєскид, ПгДр. Станіслав Конєчні, к. н., доц. ПгДр. Василь Ябур, к. н., доц. ПгДр. Андрій Антоняк, к. н., Др. Петро Крайняк і ін.

СЕМІНАРЬ КАРПАТОРУСИНІСТЫКЫ (3)

Біографія ПгДр. Кіріла Шевченка, др. н.

Кіріл Шевченко ся народив 19. октобра 1966 в Новочеркаську, в Росії. Переріз єго штудій і професіональной формаціі є слїдуоючий: В роках 1984 – 1989 штудовав на Факулті історії Московской штатной універзіты славянської і общу історію на Катєдрі южных і западных Славян. В роках 1988 – 1989 бив стажістом Філософїчной факулты Карловой універзіты в Празі. В роках 1989 – 1992 бив ашпірантом Факулты історії Московской універзіты, де в септембрі 1993 обга- тів кандідатську дізертацію на тему контактів міджі Лужіцькыма Серб- ами і Чеськословеньском у міджівоиннім періоді. В роках 1992 – 1993 абсолвовав двоймісячну стаж на Торонтській універзіті в Канаді в рамках Штіпендіі Штефана Чєпы про карпаторусиньскы штудії. У фебруарі 2009 обга- тів на Московській універзіті докторь- ску дізертацію під назвов „Лужіцкий вопрос и Чехословакия (1918 – 1948)“.

К научным интересам Кіріла Шевченка належить народностный рух славянських народів в 19. – 20. сторочу, міджіславянскы културны контакты, проблематика етнічной ідентіты славянських народів, проблематика впливу масмедій на формованя народной ідентіты, сучасна історія *малых* славянських народів.

Кіріл Шевченко є автором двох моноґафій: „Лужіцкий вопрос и Чехословакия (1918 – 1948)“ (Москва : Модест Колеров, 2004) і „Русины и междувоенная Чехословакия. К истории этно- культурной инженерии“ (Москва : Модест Колеров, 2006). Опу- бліковав тыж понад 30-х статей у научных, научно-популярных і одборных часописах присвяченых етнічным проблемам і етнічным рухам *малых* славянських народів у 20. сторочу, причім переважна часть єго штудій аналізує етнічны процєсы і рухы у Лужіцькых Серб- ів і Русинів. Предметом єго выскуму є і етнічна меншына Полїщук- ів у сучасній Білорусії.

Гостя з Прагы – К. Шевченка і вшыткых притомных в Музею русиньской культуры в Пряшові привитала директорка Інштуту русиньского языка і культуры ПУ ПгДр. А. Плішкова, ПгД., котра представила біографію реферую- чого і сучасно припомянула доводы організованя семінарів карпаторусиністыкі на ПУ. Першорядым є представити домашніх і заграничных ученых, які ся на професіоналній уровни займають русиньсков проблематиков, і пропаґовати карпаторусиністыку як молоду научну дісціпліну на Словеньску. Наслїдно пере- дала слово панови Шевченкови, котрый прочітав интересный реферат, а нако- нець – в згоді з пріятов штруктуров семінарів карпаторусиністыкі – асістєнт- ка інштуту ПгДр. Марія Мальцовска представила цінны і найновшы выданя, котры ся дотыкають русиньского списовного языка на Словеньску і русиністыкі вообше. Дакотры з найновшых выдань іштуту і Світового конґресу Русинів А. Плішкова подаровала гостєви з Прагы. (Продовжіня на 6. стор.)

Вшыткым чітателям Народных новинок і добродителям жычіме в Божій благодати прожыти великодны святкы і духовно ся підкріпити до далшых днів нелегкого жывота

Редакція Русин і Народны новинкы

Колись на валалі перед Великоднем

Я опишу ту передвеликодну і великодну атмосферу мого родного, бывшего села Руське, старинської долини, на яке уж лем спомини зістали в тих прекрасных ярних часах.

Семеронасбыло, дрібненьких як пальці. Мати не встигала печі локшы на шпартеті або бандурчаны бандята (колотічки), бо сьме прибігали з двору, де сьме ся бавили і хватали сьме їх такой горячі із шпартета. А кідь нас уж міцно выганяла із хыжи і кричала на нас, жебы сьме почекали, покы не напече, та сьме голод заганяли фалатком хліба, який сьме намастили ковкусом, або намочіли до воды і посыпали цукрём. Так сьме бігали по дворі і чекали, коли нас мати закличе к столови. А кідь уж на стіл положила миску з пирогами, стрясками або іншыми добротами, та мали бы сьте тото видіти, як вшытко за пару минут залопотіло із горця або з миски.

**Мамко наша мила,
Тяжко-сь нас годувала,
В маленькій хыжочці
До сердця тулила.**

**Варила-сь пироги,
Такы, што шкрябали,
Локшы припікала
Так, лем ся блискали.**

**Червеніли личка
Нам дітём з доброты,
Твоє серце, мамко,
Хляло од роботы.**

**Ой, міцно вно хляло,
Але вытримало,
Бо свої дітонькы
Щіренько любило.**

Кідь сьме ся понаїдали, ішли сьме за худобов, бо было треба ся вычеряти із старшыма сородинцями, які худобу выганяли на пашу наполоднє. Но а там мы, бівшы і мудрішы, стваряли вшытко можне: співали сьме, речовали і вшеляко ся бавили – на пиґу і фігу, на крутку лоптову, черешенькы „труцали“ і приказки приказовали:

**Кра, кра, ворона,
Полетіла до пана,
Дав пан телічку,
Поцілуйте мі личко.**

Або:

**Миколайко
Стратив яйко,
Гусарь йшов,
Тай нашов.**

Або:

**Шавел, Павел, Микулка,
Гребе глину як курка,
Выгріб собі ямку,
Нашов собі шапку,
Шапка была протята,
Сідали на ню потята.**

Дівкы собі ворожили, же котра ся в котрый бік оддасть.

Взяли на палець бобрунку і перекладовали ей з пальця на палець із словами:

**Бобрунка, бобрунка,
Де є твоя жунка?
Ці горі, ці долов,
Ці під чорнов землєв?
Полеть там, де я са оддам!**

При тих послідніх словах двигли руку з бобрункою над голову і она полетіла будь в напрямі до Польщі, або до Великої Поляны, Смулника, або до Рунины. Мы дівчата ся потім міцно сміяли з того, же котра



ся де оддаме. Але до сміху нам барз не было, кідь бобрунка полетіла долов на землю, бо то гварили, же ся дівка не оддасть нігде, але умре...

Як сьме ся нашалили, набавили, хлопці зачали розкладовати огонь або робили гаті на ярочках, а мы дівкы сьме посідали коло огня, вышывали сьме плахты, обрусы, настенкы і порткы. А коло того вышываня сьме співали:

**Волкы мої сивы,
Ей, скоро-м вас выгнала
Вы са не напасли,
Ей, а я са не выпала.**

**Вы са не напасли,
Ей, друбной команічкы,
Я са не выпала,
Ей, коло свой мамочкы.**

**Волочки сивенькы,
Ей, жене вас миленькій,
Жене вас на поле,
Ей, потішіня моє.**

**Познам тя, Янічку,
Ей, по гласку, по крочку,
Кідь приганяш волкы,
Ей, за нашу хыжочку.**

Найвеце сьме ся тішыли на великодны святкы. То было на валалі много радости, веселости і гойности на столі.

У суботу перед Великоднем на валалі было дуже живо.

Чістили ся і замітали двори. Хлопці сі стригли і охарєвали свої головы. Дівкы помагали матерям печі паскы і проскурчата. Туж фарбили яйця і приправлєвали буракы (цвику) з хрінном. А мы діти сьме коло того вшыткого лем побіговали і дуже сьме ся радовали, же уж буде Великдень.

Але даколи нашу дітиньску радость знали перешкодити і вшелякы пригоды, які были споєны з приправами на Великдень. Споминам сі на то, як раз нянько ня закликав надвір, бо ем была найстарша, і хотів,

**Ей, дам му писаночку,
Ей, ружову, червену,
Жебы люде знали,
Же наворожену.**

На другый день Великдень пришов. Рано ся вшыткы зачали зберати до церькви. Дівкы вытігали із шыфонера тоты найкрасшы шаты, які мали. Хлопці вязали машлі до шыї. Нянькове і дідове сі брытвили бороды, жебы холем на Великдень хоснаво вызерали. Матери рихтовали кошарикы і вкладовали до них кобасу, проскурчата (малы паскы), солонину, масло, яйця і клягану грудку сыра.

Вшыткы сьме йшли до церькви святити кошарикы. Дома зіставали лем хворы, на котрых дозерав добрый домашній псик Бодрі, Дунчо або Гарі.

**Писаночкы мої,
Лем са позерати,
Стары рочкы пришли,
Ей, мушу вас вхабити.**

**Стары рочкы пришли,
Стары годиначкы,
Мушу вас вхабити,
Ей, мої писаночкы.**

**Іші бы-м хотіла
Так до церькви іти,
Кібы мої ножкы,
Ей, хотіли служыти.**

**Але уж не служать,
Ни ножкы, ни ручкы,
Зустали біленькы,
Ей, мої писаночкы.**

Гойности, радости і веселости не было кінця-края. Ани на другый день – у Великодний понеділок. Дівкы уж од півночі ся трясли од страху перед поливачами, бо даколи ся не поливало як днесь, по паньскы з парфіном. До двора їх пришло по пять, по десять, дівку нашли, хоць-бы не знати де ся сховала, і выволокли ем на двір к студни або к ярку і поливали доты, покы ся вшыткы не вычеряли на відрі. Так золлята дівка ся не раз приволокла до хыжи а іщі мусила вшыткых погостити і обдаровати за облляты. Коло стола хлопці красно заспівали:

**Мила моя, што-сь думала,
гояя,
Кідь єсь мене любовала,
чугая,
Яворе, яворе, де маш
конаре,
Обламали мі руцаньскі
бетяре.**

**Я думала думу свою, гояя,
Же не буду нігда твоєв,
чугая,
Яворе, яворе, де маш
листочкы,
Обламали мі руцаньскі
дівчкы.**

Почас великодных свят ся поливали і хлопці, а то у Великодний вівторок, де ся дівкы намагали вернути хлоп-

цям вшытко з Великодного понеділка. Поливали їх голова не голова, кады лем запопали.

Поливала хлопців і една молода попада. Придала ся к дівкам і – цінгі-лінгі з дівками горі-долов валалом. Ту полляли, там полляли, ту выпили, там выпили – і попада ся напилла так, же в єдній хыжи ся зосыпала на землю як сніп і зістала лежати як мертва. В хыжи жыла вісемдесятьрічна бабка і розказала попадю волосём і вугликами обкурєвати, бо же попада врокы дістала. На горяче угля з волосём было треба подля бабы улляти свяченой воды. Але кідь бігли до коморы за свяченов водов, замінили фляшку з водов за якусь хемікалію. Кідь тото вылляли на горяче угля, вшытко лем засычало і засмерділо цілу хыжу. Дуры зачали заходити вшыткых, але попада ся ани куцінько не перебрала. Мусили ей выволочі надвір і зачали ей натерати, тай попада з поливаня пробудили. Веце уж нігда поливати з дівками не ходила. Найбівшов радостєв на Великдень были забавы, балы, танцєвачкы, але, главно качканя дівок на валалі, як, наприклад:

**Выжень качі на млачі,
Няй зберавуть хробачі,
Кач долов, кач,
Уженив са ткач.**

**Узяв собі Марину,
Тай пудрану перину,
Кач долов, кач,
Волала вас мац.**

**А Марина не спала,
Лем перину платала,
Кач долов, кач,
Волала вас мац.**

**У богатых дівочок,
По шістнадцять сорочок,
Кач долов, кач,
Волала вас мац.**

**А у мене єдненька,
На каждый день біленька,
Кач горі, кач,
Уженив са ткач.**

Марія ГІРОВА

